



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :

f Tir Yimym

ig tiryimym@aolima

yt tir yimym

TAPAK 7

Ozüng raksartem shinga metoktsütsü: Haryana CM

Aung San Suu Kyi nem ken o kar nung taitok agütsü



VOL. XX NO. 290 (ADOK 290)

DIMAPUR RASEMNÜ (WEDNESDAY)

LUROI (AUGUST) 02, 2023

₹ 5.00

Nagaland nung healthcare workers timi alemtsü

Kohima, August 1, 2023 (TYO): Nagaland nung district hospitals aser health centres aika nung doctors aser nurses peria mali aser iba atema Health and Family Welfare (HFW) Department-i healthcare service providers timi lemsatsüba mapa inyakdar.

Department-i asa yimtsüngtem nung ajungbena health centres mita aotsü.

"HFW Minister P. Paiwang Konyak-i tuyuba ama department-i district hospitals aser health centres ajak nung nübo asadanga timi lemsatsü mapa inyakdar" ta Commissioner & Secretary, Y Kikheto Sema-i ashi.

"Nübo peria aliba den tesem shitak nung nisung shitak mapa lemsatsütsüla. Department-i kobi melii transfer and posting metetdaksütsü" ta pai ashi.

"In-service Government Doctors/Health Workers kar pei

mapa lemsatsüba nung malir aser iba ajanga health care delivery system nung tetsükdaksü ajurur. Anungji kü den HFW directorate nung Principal Director nati ajungbena mita aotsü" ta Kikheto-isa metetdaksü.

Nisung kar leave permissions shitak melii mapa inyakdak maliba putetra Nagaland Government Servants Conduct Rules, 1968 aser Nagaland Services (Discipline & Appeal) Rules, 1967 nung lateta aliba ama temerenshi alitsü, ta paisa ashi.

Public tajungba nung yaritsü atema Department of Health & Family Welfare kübok State Government Health Units ajak nung August 10, 2023 nungi anepdang 9:00 ako nungi nikongdang 3:00 ako tashi Out Patient Department (OPD) alitsü mapang melenshir, ta Kikheto-isa ashi.

NEC ajanga Foothills Road Project inyaksü ayongzüker

Dimapur, August 1, 2023 (TYO): Nagaland Foothills Road Coordination Committee (NFHRCC), kin hohotem aser MLA tem külem senden ka amendang telemtetba aika agiogo.

July 28, 2023 nü senden amendang kin hohotem, MLA tem aser NFHRCC nungertemi Nagaland sorkar dang Foothills Road Project ya North East Council (NEC) ajanga inyaksü tayongzüka agütsütsü lemtet.

September 22, 2022 nü Nagaland Legislative Assembly bangzüng ama iba mapa inyaksü ayongzüksü ta senden nung adenertemi lemtet.

Nagaland nung mapatong aika terepranger tajung maliba aser mapa inyakterem tsüngda

amalitep shitak maliba ajanga junga meinyakteter. Anungji iba amala tia majurutsü atema NFHRCC, bangdak Department aser mapa inyakba company tem tsüngda Tripartite Agreement nung sign süteptsü lemtetogo.

Iba otsütsü mapatong tiptema inyaka aotsü atema kin hohotemi NFHRCC nem luden züngsemtem melentsü aser shimoktsü tashi agütsüogo.

NFHRCC-isa M/S L. Phukato Shohe & Sons kibur L. Phukato Shohe asüba atema par kibong den mangyim lemsatepba metetdaksüogo.

Governor's Camp, Liphanyan M/S L. Phukato Shohe & Sons ajanga Doyang apu renema yangluogo.

WSH-i P&NG atema tetuyuba agütsür

Dimapur, August 1, 2023 (TYO): Western Sumi Hoho-i parnok kübok aliba telok ajak dang Petroleum and Natural Gas dak sendakba sangdong kecha magütsütsü tetuyuba agütsüogo.

Iba ya August 1, 2023 nü

Chekiye nung Executive Council senden nung bangjemtepogo aser shiri iba onük jembidir ibaji Western Sumi nung atema masü saka pei nija atema ta züngshitsü, ta Media Cell, WSH sangdong ka nung ashi.

Kohima nung dokan ana rongdok

Kohima, August 1, 2023 (TYO): Mongulbarnü Kohima nung kitsükkirong lendong ka atalokdang Rs 40 lakh jungnüa akoksaogo.

Tanü Upper D Block colony nung aliba N Kire Market nung dokan ana rongdok.

Osang angazükba agi tanü anüngdang hotel joka ka nung short-circuit ajanga mi lendong atalok aser anameta aliba dokan ka nung kaoloka ao. Ajisüaka iba lendong nung nisung yiruba mesüra asüba osang kecha mali.

Nagaland sorkari in-service doctors dang nija mapa meinyaksü tuyur

Kohima, August 1, 2023 (TYO): Nagaland sorkari health care service providers dang ita ka tsüngda 'private practice' anentsü tetuyuba agütsüogo.

State sorkari küm ka nung in-service doctors atema Non-Practicing Allowance (NPA) nung Rs 9 crore shi endoker.

"Department-i Nagaland Medical Council aser ano jenjang balala nung asüngdangtepba den ano taküm March ita Lokayukta-i tetuyuba agütsüba ama iba osang metetdaksür" ta Commissioner & Secretary, Health & Family Welfare Department, Y. Kikheto Sema-i ashi.

Sorkar doctor temi nija mapa inyakba aser Non-Practicing Allowance (NPA) ya March 2010 nung Finance Department aser September 2011 nung HFW ajanga sangdong agütsüogo. Ano mapang shia Nagaland Health Care Establishment Act, 1997 aser tanga osangtem agüja aruogo, ta Kikheto-i ashi.

Ajisüaka, doctor temi iba tetuyuba sülen manidaker anungji sorkari office memorandum ka ajanga health care services providers aser sorkar doctor nübo amshiba nija mozü kitem o clinic nem tetuyuba agütsüogo ta pai metetdaksü.

"NPA agiba mesüra magiba In-service Government Doctor temi pei indang mozü kidang mesüra tanga nija mozü ki nung mapa inyakba ita ka tsüngda anentsü tetuyuba agütsür" ta Commissioner & Secretary-i metetdaksü.

NPA agir In-service Government Doctors aser private hospitals/clinics nung inyakteremi nija mapa inyakba anentsü mesüra ita ka tsüngda NPA meyipa agütsütsüla ta paisa ashi.

NPA magiba In-service Government Doctors-i bangdakpur dang nungi temelaba meshir ang non-working hours mapang private consultations aser services agütsütsü akok ta paisa metetdaksü.

Iba tetuyuba sülen manidaker indang license agentsü akok ta Commissioner & Secretary-isa ashi.

Nagaland nung sorkar doctor kwikati nija mapa inyaker ta osangbeneri asüngdangdang "Lokayukta ajanga sorkar doctor 51 tenüng agütsüogo" ta Kikheto-i langzü.

Tesüiba nunga iba ama sangdong agütsüogo saka tan yabo mapa küma inyaksü ta Principal Director HFW, Dr Vibeitunuo M. Sachu-ia ashi.

Iba ajanga in-service doctors aser shirangertem ajangzüksü. Iba inyakyim ajanga sorkar mozü ki ajak nung health services tajungba agütsütetsü, ta laisa ashi.

"Nagaland Medical Council ajanga doctors ajak züngsem aser parnok degrees jangjashir" ta president Dr Joyce Angami-ia ashi.

Doctor ajaki inyakyim shiyak sülen anidaksü aser office memorandum tashi angatsü imlar, ta laisa ashi.

APO aser KVC ajanga Naga Club ki atema latettsür

Kohima, August 1, 2023 (TYO): Angami Public Organisation (APO) aser Kohima Village Council (KVC) ajanga Naga Club ki atema tebilembatem lemsatepba agizüker ta Naga Club-i metetdaksüogo.

"APO aser KVC teloktemi tebilemsü khuret tulu bena Naga Club (NC) aser Naga Students' Federation (NSF) tsüngda ken o atema tiyongtsüi aitogo" ta NC

president Kuolachalie Seyie aser general secretary K N Mhonthung Lotha nati ashi.

Pamoki putiotsü kanga junga asadanga aser tangatetba shitak nung bangzüng kar renemogo aser ibaji NC o NSF nati agizüksü benogo ta NC mendenpurtemi ashi.

Iba ki kibur aser yanglutsübaji Naga Club asütsü, azüklen menden aika amentepa atuba ki yangluzükba sülen NSF office

atema takdang kar agütsütsü, Naga Club ki ya Naga lima nung Naga nung ajak meyong lir aser NSF-i August 2023 tatem tashi iba ki nung office amshitsü temelaba agütsütsü akok ta APO aser KVC-i shidangogo.

Naga Club-i APO aser KVC ajanga ashibatem agizükogo aser tangatetba tajung nung iba ken o tembangtsü ta mendenpurtemisa metetdaksü.

Ungma ya Aor putiotsü tenzükdak lir: Advisor Imkong Imchen



Ungma, August 1, 2023 (DPRO Mkg): Mokochung kübok Ungma yimtsüng nung Soyim Shisaluyimer Telongjem (SST) ajanga tanü Tsüngremmong benjung ayongzüka mongogo.

Iba sentong nung IPR & Soil & Water Conservation Advisor Imkong L Imchen-i tetushi süa jaoker ka ama shilem agia liasü.

Ungma yimtsüng ya Aor putiotsü tenzükdak lir aser Aortem asoshi kanga dang

tongtipang yimtsüng ka lir, ta Imkong Imchen-i o jembidang ashi.

"Tsüngremmong benjung amongdang asenoki asen sobaliba mamadokli kechiyong aseok kin balaka ama asen maitsü ya khenyongi balaka lir. Sobaliba inyaksangshitem mapang den apet melenshir saka sobalibabo memelenshir" ta paisa ashi.

Iba benjung nung

Ongpangkong Kaketshir Mungdang aser Soyim Shisaluyimer Telongjem ajanga yartsüngsang ajanga shilem agi aser Tenemsanger Choir o Kosasanger Putu Menden Ungma ajanga ken ajanga shilem agi.

Maneni, Rarentemjen Jamir, Tatar-i Tsüngremmong ratet jembi aser Ongpangkong kaketshir Telongjem tiri salem osang aben.

Mokokchung nung Anava hospital lapokogo



Settsü yimtak tanü Anava Hospital lapoker kelen Doctor-tem aser yangji inyaksüpurtem külemi tangokba noksa.

Mokokchung, Luroi/August 01(TYO): Settsü yimtak tanü Anava Hospital lapokogo. Anava Hospital ya Mokokchung town nungi kilometer 12 pilar lir aser Settsü nung lushi nung Nagaland University Lumami-i aiba lenmang anasa lir.

Iba mozüki ya tang asoshibo OPD dang lapoker aser tang nungtakba osettsüset peria yua lir aser mapang tatsüka lir kelen ano temaba jenjang nung ajungketa lapoka aotsü ta

ketdangser ajanga metetdaksü. Tanü iba sentong nung Anava Hospital kibur aser yangji inyaksü alila Dr.Naida Jamir-i kechiba lai lar lima Switzerland toksür Kinüingbo Dr. Süngti den aruagi Nagaland nung arem ka nung Hospital lapok iba indang nükjidong lemsatepa liasü.

Kasa sentong nungsa Wb. Metongmeren Ao, Chairman, Anava Welfare Society, Advisor, Transport and Technical Education

Temjenmenba, Settsü Village Council Chairman aser Changki Union Mokokchung Tir, parnokia shilem agia jembiba den Chubatemsu ajanga ken tajung ka tena sentong lemladaksü, sentong tenzüka Christ Church Pastor Imli Jamir-i sarasademba den Limaonen Imchen ketdangsuba nung iba sentong agi aser iba hospital ki meshiteta Mokokchung Town Baptist Arogo Pastor Rev.Ponen ajanga sarasadema liasü.

Civil Works (Housing) project tem scope melenshiba nokdang

Dimapur, Luroi/August 01 (TYO): Works and Housing Department ajanga sangdong ka agütsüba nung, Government of Nagaland kübok Public Works Department ajanga inyakba civil works project ajak mapa kuma meinyakdang department ajungai technical approval, administrative approval aser planning clearance meshitsüla, ta ashi.

Item atema Planning & Coordination Department ajanga civil works projects tem mapa kuma meinyakdang approvals atema ketdangsurtem shima lir aser itemji yamai alitsü:

a. Sen Crore 3 tekübok projects atema: Chief Engineer Concerned

b. Sen Crore 3 nungi 5 project atema: HLTC & SPRMCC
c. Sen Crore 5 nungi tema projects atema: SLPIMC
Project ajak atema 'scope of work' ya item ketdangsur temi approval stage nung ano tender aser contract magütsüdang soita lir. Ajisüaka department aikati item ketdangsur nungi temelaba magie project tem mapa kuma inyakdang scope of the work (Bill of Quantities) melenshir, ta sangdong ajanga ashi.

Ano Department ketdangsur/senior dignitaries temi site engineers aser contractor tem dang mapa inyakba tesem nung ketdangsur nungi jelia temelaba magie 'specifications' melenshitsü,

inoktsü mesüra agientsü totuyuba agütsür.

Iba amala yimya amshiba ajanga project nung sen tali akumer, project menudaksür aser mapa inyakba yimya aser site engineers tem lendongi yoker. Anungji department ajaki project tenzükdang nungdakba 'scope of works' repringshimsü aser tashi agüja shimteta aliba committee tem nungi temelaba makai project inyakdang mesüra tatemi scope memelenshitsü ajungshir, ta sangdong ajanga ashi.

Scope of work nung melenshitsüsa adokra, mapa inyakba tesem nung totuyuba magütsüdang ketdangsur nungi temelaba agitsüla, ta sangdong ajangasa ashi.

Nagaland sorkari nisung takum den masayatsüla: NPCC

Dimapur, Luroi/August 01 (TYO): NPCC Public Grievances Cell ajanga state sorkar dang nisung takum den asayaba anentsü nenshia ashi aser P&AR rules nung aliba ama tekeraba nung Medical staff tem yoktsü takhangba agüja liasü.

Sangdong ka nung Public Grievances Cell ajanga ashiba agi, June 23, 2020 nü post 186 yanglua liasü aser yangji Specialist post 15, Medical Officers 44, Ayush Medical Officers 11, Dental Sergeant asem, Research Scientist trok, staff nurses 78, Lab technicians trok, ECG technician ter aser OT Technicians 13 liasü.

Mapang tatsüka lir Department of Health & Family Welfare ajanga post tasen aser tazüing aliba atema post vacancy

195 atema advertisement ka adok aser NPSC ajanga meshim tashi appointment ya khen atema dang, ta jangjangja shia liasü, ta ashi.

Ajisüaka department-i ano November 2, 2022 nung post 329 atema special recruitment drive ka atongteta marks 487.5 nungi marks 175 bo contract nung inyaka alirnem agütsütsü ashi, anungji Nagaland sorkar kübok department ajak atema P&AR rules kasa yanglua aliba aleymyia liasü.

Yamaji Combined Technical Associations of Nagaland (CTAN) ama jashia aliba kaketshir temi osang sangdongba nguogo aser Dental aser Ayush branch nungi janra aliba doctor temi court nung iba special recruitment drive anema ken o benoka lir.

P&AR rules nung aliba ama inyaka special recruitment drive ya thitsüra ken o agientsü renema lir, ta ken o benoka aliba doctor temi ashi.

Anungji Nagaland sorkari iba ken o nung temolung agüja tekeratiba nung mera agitsü aser Naga nung senti takum den masayatsü akhanger, ta NPCC Public Grievances Cell ajanga ashi.

Iba takhangba agüja aliba ama meinyakra Grievances Cell ajanga pei dak apet mera agitsü, ta ashi.

Tangatetba shidak aliba lokti tentet temia iba maparen nung yaritsü ayongzüker, kechiaser CHC, PHC aser district hospital tem nung doctor peria maka, anungji anogoshi nüburtem taküm lendong nung yutsür, ta sangdong ajangasa ashi.

NSCN/GPRN ajanga Tsungremmong salem abener

Dimapur, Luroi/August 01 (TYO): Ao Naga nung ajak dangi Tsungremmong benjong salem abener, koba August ita mezüing hopta nung amunger aser anibelega alu wadang inyakba tembanga alurutsü lia amungba benjong ka lir, ta NSCN/GPRN (Akato Chophi) indang Ministry of information & Publicity (MIP) sangdong ka ajanga ashi.

Alu tsüksüing-ensünga arutsü

asoshi Tsüngrem nungi temoatsü jazüka iba benjong ya alu arutsü lia amunger.

Naga nung kintem rongnung Ao Naga nung ya tejaklen aliba kintem lir aser wadang aika nung parnoki tematiba jenjang tongteter aser anir. Iba benjong ajanga Naga nung rongnung telungjem aser yimjung tanüla adokdakjangma, ta NSCN/GPRN (Akato Chophi) sandong ajangasa ashi.

K.Talitemüsü züluba Naga yimten kaket ka saya



"The Cul-De-Sac of Naga Political Case" kaket sayaba mapang kaket zülur Wb.K.Talitemüsü (achijilen), Rev.Dr.L.Kari Longchar aser Dr.Lanusangla nungertem noksa nung angur. (TY)

Dimapur, August 01 (TYO) : Tesayur tajung aser kaket zülur Wb.K.Talitemüsü English nung züluba kaket ka tenüing agi "The Cul-de-sac of Naga Political Case" tanü Rev.Dr.Kari Longchari yangi Tourist Lodge, Dimapur nung sarasadema sayatsüogo.

Iba kaket sayatsür külen kaket zülur nem tenüingsang agüja jembidang, "iba kaket ya shinga tsütsü atsünga masü saka kanga junga bushisingdanger indangindanga züluba kaket ka lir. Iba yagi Naga yimten temeten aser tangatetba asentenshidaksür," ta Rev.Dr.L.Kari Longchari metetdaksü.

"Asenok Naga nungertemi asenoksasa asen tashimait bushitsüla aser Naga kini Tsüngrem dang taidok meshiba mapang ka agitsü kanga nungdaka kümogo," ta paisa ashi.

Naga nungertemi teti India aser British nungertem dang aija dang jembir, ajisüaka India nungertem ya Naga nungertem aser British nungertem Naga nungertem tamajungba tia nungi kümzüka aruogo ta Rev.Dr.L.Kari-isa metetdaksü.

Iba kaket züluri pai züluba kaket indang telok den mapang tatsüka agia lemsatepdang, "tarutsü asoshi bilemba Naga nungertem lenir tajungtemi 1947 küm nungi 1956 küm tashi nung Naga yimten temeten kimong yanglua metoktsü asübo, tanü India den Naga yimten temeten indang jembitsü kecha onüka

melila," ta metetdaksü. Naga yimten temeten asoshi prangpong injang amshia raratsü menüingdaker saka ibai tangatetba aser tashitemetet ajanga raratsüba mapa ka kümogo, anungji asenoki India nungertem ajurua jembitsüla ta Wb.K.Talitemüsü ashi.

Alima nung yimten temeten atema raraba mapang, asenoki angatetsü makokba sayatenya mapatem ataloker aser atalokdagi, anungji asenok kanga kümndanga alitsüla ta paisa tang Manipur nung atalokba tensa tia indang tera shisema ashi.

The Cul-De-Sac kaket nung ya Naga nungertemi British aser India yimten den Naga yimten temeten indang jembiba onük, anogo aser tesem aika indang shisema lir. Ano, Naga National Council lenirtem rongnung mangatetep adokba ajanga Naga yimten onük tanü tashi metembangtetsüsa atalokbatema shia angutsü.

Tanü iba kaket sayaba sentong nung menden Dr.Asangba Tzüdir liasü aser Heritage Publishing House ketdangser Dr.Lanusanglai kaket zülur taküm indang telok den lemsatepa pelaba o lemsatep. Iba sentong tenzüka sannüker Yanbemo Lothai sarasadema liasü.

Iba kaket zülurisa tamalen Naga yimten indang kaket ka tenüing agi "The Missing Link" zülua lir. Iba kaket ya kaket ayokba tesemtem nung senpak 600 agi angutsü.



Aug. 01, 2023 : Union Minister Nitin Gadkari aser Himachal Pradesh Chief Minister Sukhvinder Singh Sukhu nati Kullu nung tzumetsung ajanga teraksatsubatem asadangba noksa nung angur.

PM Modi-i Pune nung metro train tenzuktsüogo

New Delhi, Luroi/August 1 (Agencies): Ato Kilonser Narendra Modi-i Mongolbarnü Maharashtra kübok Pune yimti nung Pune Metro Phase-I nung corridor section ana tambanga yangluba sülen metro train tenzuktsüogo.

Section ana ya ka Phugewadi station nungi Civil Court station tashi aser tanabuba ya Garware College station nungi Ruby Hall Clinic station tashi asütsü. Iba mapa atema nungshilong ya Ato Kilonser-i 2016 küm azüngja liasü. Section tasentem yagi Pune yimti nung like Shivaji Nagar, Civil Court, Pune Municipal Corporation office, Pune RTO aser Pune Railway Station amala tongtibang tesemtem sendakteptsü.

Kasa mapang nung PM Modi-isa, Pune kübok Shivaji Nagar Police headquarters nung project balala atema nungshilong azüngtsüogo.

Pune nung Lokmanya Tilak National Award agizükba sülen Ato Kilonser-i, sen crore 15,000 alang project balala atema nungshilong azüngja liasü.

Shivaji Nagar Police headquarters nung sentepa aliba lokti den o jembiba mapang PM Modi-i ashiba agi, nüburtem libaliro jenjang ajungkettsüsü atema sorkari takokba tashi inyakdar.

"Sen crore 15000 shi alang project tem inyaktsü atema nungshilong azüngtsüogo. Sorkari yimti nung middle class aser professional tem libaliro jenjang ajungkettsüsü atema süoki ia agidar. Nüburtem libaliro jenjang kodang ajungketdir idangji yimti kanga kara renlokyonga aoer," ta pai ashi.

PM Modi-i Mongolbarnü ashiba agi, pa nem Lokmanya Tilak National Award agütsüba ya pa asoshi kanga tongtibang anogo ka lir.

Pune nung sentong ka nung

o jembiba mapang pa Nationalist Congress Party (NCP) lenir Sharad Pawar den sabang ka nung shilem agia liasü.

Ato Kilonser-isa, pai award indang senpet ya Namami Gange project atema tenla agütsüsü telemtetba agiogo.

"Ni senpet ya Namami Gange project atema tenla agütsüsü telemtetba agiogo. Ni sen crore 140 ya linük nung aliba nüburtem atema bendanga agütsüner," ta pai ashi.

Iba award ya Tilak Smarak Mandir Trust-i 1983 küm Lokmanya Tilak tenüng nung agütsüsü atema amenok.

PM Modi ya iba award agizüker 41buba kümogo.

Taoba mapang iba award ya Shankar Dayal Sharma, Pranab Mukherjee, Atal Bihari Vajpayee, Indira Gandhi, Manmohan Singh, NR Narayana Murthy, aser E Sreedharan nungeria agizüko.

Tamil Nadu CM Stalin-i teyari agütsüsü atema Birendang temelabameshi

New Delhi, Luroi/August 1 (Agencies): Tamil Nadu Chief Minister M K Stalin-i, mepetmesü nung aliba Manipur state dangi mozü densema teyari yoktsü asoshi Manipur CM N Biren Singh dangi shiti ka zülüogo.

Tamil Nadu sorkari Manipur dang relief camp nung alirtem dangi teyari yoktsü atema temelaba agütsüsü asüngdanga liasü.

July 31 nü yokba shiti nung Stalin-i Manipur chief minister dang, state nung tensa majungba ajanga nisung 50,000 dak tema relief camp tem nung jenoka lir ta kü nem osang agütsüogo, ta ashi.

"Mepetmesü agi kongshir

alirtem tenüngdakba tali küma odar. Iba amala mapang ka nung Tamil Nadu sorkari sen crore 10 alang tarpaulin sheets, bed-sheets, mosquito nets, mozü, sanitary napkins, aser mamatzü powder amala tenüngdakba osettem yoka teyari agütsüsü mulunga lir," ta Stalin-i ashi.

Iba teyari ya camp nung jenoka alirtem atema kanga nungdaka asütsü aser nungdaka dang süra parnok tayimtsü amshia anintsü, ta pai ashi.

"Iba teyari agütsüsü atema ner sorkari temelaba agütsüsü mepeshia asüngdang. Maneni iba dak sendakba nung kechi jenjang agütsü ali iba indang onok nem metetdakangma, ajita

asünungdang state nungi ketdangürtemi ner state ketdangürtem den tongtepratepa takaratiba nung teyari yoktetsü," ta Chief Minister-i shisem.

Stalin-i taoba mapang Manipur nung asayartem nem Tamil Nadu nung training facilities agütsüsü atema maongka agüja liasü.

Manipur nung kin ana tsüngda mangatettep adokba sülen tang tashi nung nisung 160 dak tema taküm samaogo aser nisung 50,000 dak tema pei talidak ki toktsür jenshiaogo.

Manipur nung nütsünyongsü shilem 53 Meitei nung lir aser shilem 40 dak tera tali Naga aser Kuki nung lir.

Ozüng raksartem shinga metoktsütsü: Haryana CM

New Delhi, Luroi/August 1 (Agencies): Hombarnü nungi tenzüka Nuh aser kidanger district tem nung mepetmesü adokba sülen Haryana Police-i FIR 44 benoka nisung 70 puogo, ta Chief Minister Manohar Lal Khattar-i, Mongolbarnü Chandigarh nung par kidang senden amenba sülen ashi.

Paisa, özüng alema inyaksangshirtem nem temzüng özüng kübok tapet temerenshi agütsütsü, ta tenangzükba agütsü.

Nuh nung Hombarn nikongtsütsü tenzükba azütokshi lendong indang jembiba mapang Khattar-i ashiba agi, "özüng alema inyaksangshirtem shinga metoktsütsü. Osang ajanga ashiba agi, tang tashi nung iba azütokshi lendong nung nisung pongu tashi taküm samaogo. Asür kinungertem nem teyari agütsüsü." Asürtem rongnung home guard ana aser civilian asem densema lir. Iba lendong nungsa nisung aika yiruogo.

Iba tatalokba ya kanga tia maka tatalokba ka ta shia chief minister-i, "nisung kari social yatra ka minprongtsü atema maka liasü koba küm shia ayongzükba agir. Item nisungtem yagi police tema makogo. Lendong ya tesem balala nung ataloka liasü aser garia aika rongtoktsüogo. Nuh nungi mesüaka shirnokisa iba mepetmesü nung densema ali, parnok maitsü jangjaba sülen merenshitsü," ta ashi.

Khattar-isa, central forces company 16 aser Haryana Police company 30 tensa azüoktsü atema Nuh tongogo. "Kidanger district Palwal, Gurgaon aser Faridabad nung mepetmesü tera atalokba sülen tensa azüokogo. Item district ajak yimjung nung lir. District kar nung CrPC kübok Section 144 dak ajemdaker tenokdangba agütsür aliba dak alia kümdangshia atatsü atema Nuh nung maneni curfew benoka lir," ta chief minister-isa shisem.



Aug. 01, 2023 : Ato Kilonser Narendra Modi, Maharashtra Angh Ramesh Bais aser CM Eknath Shinde nati Pune nung agizükba noksa nung angur.

BJP züngsemtemi Rajasthan Secretariat longbangtsü merang: police temi mintok

Jaipur, Luroi/August 1 (Agencies): Mongolbarnü BJP züngsemtemi Jaipur nung sorkar secretariat longbangtsü merang, ajisüaka police-i water cannon amshia parnok nokdanga liasü.

BJP züngsemtem yagi, tatidang paper leak asüba, tetsürtem anema inyaksangshiba aser ochi mashi ken o balala atema Ashok Gehlot-i aniba Rajasthan sorkar anema longka aita liasü.

Mongolbarnü BJP züngsem noklang aikati tenokdangba agütsür alibatem agina secretariat leni aotsü merang aser iba mapang police den mangatettep tera adoka liasü. Police temi tenokdangba agütsür aliba magütsü asoshi shiaka mangaba ajanga longkak aiterem nokdangtsü asoshi water cannon amshia liasü, ta police ketdangtsür kati ashi.

Iba longkak aitba sentong ya opposition party indang "Nahi Sahega Rajasthan" campaign nung shilem ka liasü, kong state kübok district balala nungi party züngsemtemi shilem agia liasü. BJP-i züngsem lakh 1 anidena secretariat longbangtsü sentong yanglu, ajisüaka, iba tesemi

police peria yoker ataba ajanga parnok nokdangteta liasü. Mepetmesü adokba sülen BJP lenirtem aika sota ayu saka mapang tatsü ka lir chiokatok.

BJP-i longkak aitba ken o tem rongnung red diary ken o-a densema liasü, koba mapa nungi anentsür aliba minister Rajendra Singh Gudha-i taoba hopta assembly nung benoka liasü. Taoba minister yagi ashiba agi, 2020 küm Sachin Pilot-i anir sorkar anema apusoba mapang Gehlot-i aniba teloki sorkar kümzüktsü atema MLA tem nem sen agütsüba osang tejangja iba diary nung lir ta ashi.

Longkak aitba sentong metenzük tsüngda Opposition lenir Rajendra Rathore-i züngsemtem den o tatsüka jembiba mapang pai, "party nung züngsem ajaki Gehlot-i aniba sorkar tsükdaktsütsü atema inyaktsü. Rajasthan nung aliba nüburtemi Gehlot tetsüng nung bandage tem lapoktsütsü atema inyaktsü," ta ashi.

BJP source kati ashiba agi, party-i tang 'Parivartan Yatra' ka tenzüktsü kong state kübok tesem balala nungi party lenir tejentemi shilem agütsü.



Aug. 01, 2023 : State Primary Teachers (Ex-Cadre) Mahasangh kübok primary tesayurtemi Bhubaneswar nung parnok takhangbatem pusema longkak aitba noksa nung angur.



TIR YIMYIM YIMOBILEM (EDITORIAL)

DIMAPUR RASEMNÜ, LUROI(AUGUST) 02, 2023

Rongrong aser Petsaperong

Tang ya linük nung rongrong aser petsaperong adoka loktiliba mesungjemteti akümba mapang ka lir. Aji oda, yimteni repranga dang melii jet ta teinyaktsü ka inyaka menokdangra, oda-oda linük ajaklen telok o telok na azü tokshitepa rara tenzüksü aser idangjibo India nung o India nung na tsükchir kümer ajaklen raratsü. Iba amaji tang Manipur nung atalokba lendong yaa center government-i repranga lia India nung o India nung agi tsükchir dang nungi tamajungba küma tsükchitepba mapa ka asütsü. Iba tatalokba yagi tatar sendena süngjema magiteti rongrong tulu adokba mapang ano Haryana nung tamangba yimsü ana tsüngda mangatettep adoka nisung dena khasettsüsa lendong atalokbaji India asoshi arrsangoktsüba mapa ka asütsü. India yimten nüchiso bushiba mapanga, külem India nungersa süaka Hindu nungertem o Muslim nungertem na tsüngda tangatetba o tajung jembia putepdaksütsü melen telok anatsülen kati ka sempatsüsa o jembiba agi, India nüchiso anguba anogoji India nung Hindu nungertem o Muslim nung na tsüngda rara tenzükba anogo amai aküm aser yimti yimdong nung nisung zü agi ayong küma yima raratepba otsü yashiang atalok amai jembir. Iba ama tamangba yimsü aser kin balala tsüngda azü tokshitepa raratsüsa atalokbaji ajungbena ataloker masü saka yimten aser lokti lenirtemi lokti senden nung tangar telok aser tangar kin aija jembibet jembia-jembia tamangba yimsü kati ka sempaa aiter aser kin kati kin ka mereprangnü aiter. Aji oda, tanü linük nung yimten yimsüsürtemi jembiba o ji angadangra, yimjung aser tesünep asoshi inyaktsü bilema ayongzükba o masü saka ain adoka telok ka mesüra tamangba yimsü ka aija jembiba dang angashitsü. Iba jagi nübortem mulungjang menentsür aser ain adokdaksür, anungji tangar yimsü aser sobaliba anema tashiyim agi inyaktsübaji senso ka mapa amai tangatetba tai ka agütsür. Tanü linük nung rongrong aser petsaperongji yang nung jagi tenzük. India ya alima nung alir ajak aliba lima ka lir, anungji alima nung nisungtemi amangba tamangba yimsü ajak India nung lir. Item rongnungji kati ka maitstütepi akhümtsübutepa lia arur joko küm 75 jungogo. Atangji, ibaji Mahatma Gandhii bilemba aser aginüba India lir. Ajisuaka, tanü asung ka nungi tenzuka India nung temeim mapa inyaker Khristan-tem anema jembiba aser inyakba kanga angashir. Ano külen nashi kisung meiner jajaba agi taküm dena aoba lendong aiben ataloker. Asenibo teküpok tia nung alirtem meima parnok asoshi kecha mienyaker, saka kari danga parnok jenjang tajungba kümdaktsütsü asoshi school aser mozü ki lapoka inyakra, item temeim mapatem anema apusoba mapangji tang ya lir. Aji oda, Kolkata yimti yimdong nung tsürabur adianu mali, talidak kia maka ayatzüra aser tashidak agi asütsüba purtem kümzüka anepalula, Mother Teresa tashi aitsürtemji India nung lir. Iba ama shisatsü adenba nisung aser yimten lenirtem alidak kodaser nübortem tesünep nung alitsü. Asenoki jungjunga bilemdangra, shibai kechi yimsü agizüka amangdir amangang, ajak tajung dang, kechiyong tamangba yimsü ajaki temeim indang sayur. Khristan-temi ajemrepa aliba purtem meima yariba nung kechi tai ali ? Mesüra kasa temeim mapaji Hindu mesüra Muslim nungerteminyak nung yangji kechi tai ali ? Itemjibo kati ka ajungshitepa inyaktsüla. Iba ama temeim mapa jagi dang linük topur ajungtsü aser senso shinga ayatzüra timtem majurutsü. Koba yimteni yimsü südir süaka nübortem rongnung sempatepdakja aser tsükchi tendakja inyakbaji an molokbang nung atem amai dang asütsü. Ibaji tanü akümlirtemi aser talisa India nung alirtemi Hitler mapa aser taküm nungi angazüksüla. Tanü India nung aikati Hitler nung sanga jembir aser pai amshiba tamaitstü noksa sapua amshir, ajisuaka asenoki mamatsüba kaji, Hitler-i German senso pur nem Yihuda nung sempadaksüba taaji pai pasasa pa taküma dena sempaa ait, anungji pai pasasa pa taküm agia tembangbaji dang liasü.

OLEMSABANG

BIBLICAL CHURCH MODEL (BCM) INYAKYIM YA AO AROGO AJAKI AGIZÜKTSÜLA

- L.Kika Pongener.

Ao Baptist Arogo Mungdang (ABAM) küpok lim arogotem ajaki liromedema Biblical Church Model (BCM) inyakyim ya agizüka inyaka benschia aonungbo kanga jungla ta kü tebilemba lemsateper. 2016 ABAM küm tatem Central Council nung lim arogotem ajaki liromedema inyaka aotsü bangzunga agizüka ayu. Anungji lim arogotem ajaki liromedema inyaka benschia aonungbo kanga jungla. Asen Ao limai Khristan yimsu mezung arudang tesasatsüka, otsüla oboula nungeri arogo menden yimsusuba inyakyim ya 'Putu Menden' yimsusuba inyakyim den kasa amai tangatetba nung agizük, aser iba tangatetba nungji tanü tashi inyaka arur. Anungji Ao arogotem iba tangatetba nungi tanü tashi mepilateter, ibajagi arogo inyakyim ya alima yimden bangdak menden ka amai meyoktepa angateter anir. Kodang alima yimden ta sudir, iba ya sobaliba dak tera yanga lir, saka kodang arogo ta sudir, arogo yabo laishiba tesayuba nung tera yanga lir. Anungji yimden aser arogo ana ya inyakyimji khenyongi balala ta angateter. Aji oda, Khristar arogo inyakyim aser alima yimden inyakyim ana ya balala bendanga inyaktsü atema, Biblical Church Model (BCM) inyakyim ya kanga junger ta bilemer.

Biblical Church Model (BCM) inyakyim nung ni junger ta agizükteba kar : Lim arogo tenzükba nung tongti lennir ka dang alitsü aser aji Pastor asütsü : Lim arogotem ajak nung, Pastor kati anir Department/Ministry shia nung tekolak ka-ka lir (Tesayula, Youth Director, Christian Education Director etc). Tanübo lim arogo teimba ka nung 'Associate Pastor' ta nungja melenogo. Mapang kar nung, lim arogo kar nungbo, inyakyim/sentong kar nung item tekolaktem tsüngda nung, pei pei kibur küma, tashi (Power) raktepa mangatettepa adoker. Pastor asüyongjia tanga Department/Ministry nungbo tebang mejushitsüla, teka mamuoktsüla ta mapang kar nungbo inyakyim kar nungbo ashishitep ken o-a adoker. Aji oda, arogo nung Kibur aser tekolakji Yisu Khrista lir, saka alima nung tenuki anguba arogo anitsü/anuktsü atema Pastor nem Yisu Khrista melena tashi agütsür nungloktsü ta laishibai sayur. Ajisuaka, yamaji arogopur ajaki angateta aliyongjia, alima asünungji mapang kar nungbo tashi raktepa atsüteptsüsa-a akümer. Aji oda, iba ama tensa tia majurutsü atema BCM inyakyim nung indang-indanga "Lim arogo tenzükba nung tongti lennir ka dang alitsü aser aji Pastor asütsü" ta jangja-janga sayua aliba jagi, arogo nung tongti lennir/tekolakji Pastor-a ta tali rajemtsür.

Deacon Board nung Ministry tekolak ajak zungsem ama adentsü : Arogo Department/Ministry shia pei pei teinyaktsü mapa, arogo inti mongdang (General meeting) nung approval agitsü atema Deacon Board dangi abener, saka mapang kar nungbo, mapang shidak nung tongtepratep mesutetba ajanga, Department/Ministry nung teinyaktsü mapatem karbo mapang shidak nung meinyakteter. Ano mapa karbo kanga tongtipang sernung, kanga junga mangajemba agi, Deacon Board-i arogo inti mongdang dangi mabenba ajanga arogo telung nung mepetmesua adoktsüsa akümer. Ajisuaka, BCM inyakyim nung Department/Ministry ajak (Women, Youth, Christian Education etc) nung tekolaktem ajunga Deacon Board nung zungsem ka-ka ama adenba ajanga Department/Ministry shia teinyaktsü mapatemji, külemi mener asadanga angatettepa telemtetba agir. Aji oda, külemi mener tatsü-talang ajak asadanga/lemsatepa jembiba jagi mela-mela angajemer aser mapang shidak-shidak nung tongtepratepa kecha tesukdaksü meli-i inyaka aor.

Arogo senbong ka dang asütsü : Tang inyaka benschia aliba inyakyim nungbo, arogo nung Department/Ministry shia senbong balala yua lir. Ibajagi Department/Ministry shia sarusaji/tenla-tenji balala sarua inyaktsüsa akümer. Aser item saru/tenla ajakji kibongtem nungi dang sarur asünung, kibong ajak kasa masüji sensaker/tilar balaka kanga tim-atemer. Tanü lim arogotem nung saru/tenla onsaraba agi tamangertem lakteta akümer. BCM inyakyim nung kanga tajung kaji, arogo senbong ka dang asüba agi, arogo intiba nung tershilem/temoatsü/tepela tenla/zungsem saru, yamala dak alaka tanga Department/Ministry indang saru/tenla kecha balaka maliba agi arogopur kibongtem nem timtem magütsür. Ministry/Department shia küm tsüngda teinyaktsütem atema Budget renema Deacon Board dangi abentsü, aser Deacon Board-i asadanga repranger, arogo küm tatem inti mongdang (Annual General Meeting) dangi approval atema abentsü, ajiser, arogo inti mongdangi approval asüba Budget ajak arogo senbong nungi agiteta agütsütsü, aser Ministry/Department ajak pei pei shilem teinyaktsütemji akhi ama parnok sasa inyaktsü. Anungji BCM inyakyim ya kanga junger ta nibo bilemer.

Deacon shimdang tetsür aser tebur tebandang mekai shilem agitetsüsa shimtsü : Temalen shisemba ama, mezung yimsu agizükdang 'Putu Menden inyakyim den meyoktepa angateter agizükba agi, 'Arogo Menden' (Deacon Board) nung tetsür-bo kecha shilem mali ama tangatetba nung tanü putu tashi inyaka arur. Ajisuaka, laishiba nung jungjunga zungdangra, arogo nungji tetsür-tebur kecha tebandang mekai shilem agitsütetsü jangja-jangja sayua lir. Arogo ya tasen laishiba tesayuba nung amendaker inyaka aor asünung, Yisu alimai arur pa Ministry mapa tenzuka inyakba mapang nungi, Tenyartem mapang tashi nung 'Osangtajung tenyaba mapa inyakba ajak nung tetsür-ia dena tongti shilem agia inyakba angutsü. Anungji arogo nung tetsür tebur tebandang kecha meli-i tenzüksü maongka agütsütsüba tangatetba nung, tanübo asen lima nunga tetsürtema ordain asür, aser Deacon-shima tenzüksü maongka agütsür. Tanü putu nung joko alima ajunga nung yimden yimsusuba menden nunga tesurtemi tebur den kasa shilem agiba angur. Aji oda, BCM inyakyim nung tetsür tebur ajaki Deacon inyaktsü maongka agütsübaji laishibai melaba inyakyim shidakba ta angateter. Anungji BCM ya lim arogotem ajaki liromedema agizüka benschitsü junger ta kü tebilemba lemsateper.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Haiti: Khristan ministry ka nungi nurse aser jala pua bener ao



Alix Dorsainvil aser lar jala pua bener aoba chiokang ta takhangba agüja July 31, 2023 nü Port-au-Prince nung nüburttem yimtung süa jajaba noksa nung angur. Noksa telung nung Alix Dorsainvil angur.

Port-au-Prince, Luroi/ August 01 (Agencies): Haiti nung American nurse ka aser lar tanur ka pua bener ogo, ta la inyakba Khristanpur yariba tentet kati ashi.

Alix Dorsainvil ya Port-au-Prince anasa community ministry ka nung inyaka lia pua bener ao, ta El Roi Haiti ajanga sangdong ka nung ashi.

US State Department ajanga parnoki Haiti ketdangsur den osangtsüsang agiteper, ta ashi.

Haiti nung aliba ketdangsur temi linük balala dang par linük nung 'armed gangs' tem talenba nungi salaba nung yaritsü ayongzuka liasü.

Dorsainvil ya El Roi Haiti indang director aser founder, Sandro Dorsainvil kinungtsü lir.

"Alix ya dangar dak aria bilemba aser temeim agi sünga aliba nisung ka lir aser Haiti ya lar linük amai bilemer aser Haiti nung ya lar tembar aser kibong amai bilemer," ta El Roi Haiti ajanga sangdong nung ashi.

Tena meyipa shilangtsü asoshi inyakteper ta iba charity yagi ashi.

Iba tentet yagi nüburttem dang Alix aser lar tanur kumzüksü mechi social media nung tapi agi osangtsüsang meporoktsü ayongzuka liasü.

Dorsainvil ya New Hampshire state nungi lir.

Tena pua bener orr anogo pongu jungogo, saka US State Department ajanga tang tashi tena shirnoki pua bener aor meshiteter aser tena pua bener aor temi tena chioktsü atema senotsü kecha meshia mali.

Alix Dorsainvil aser lar jala ya Brehostibarnü prangbong bena aliba nisung telok kati la inyakba health clinic nungi pua bener ao, koba Khristan ministry ajanga lapoka liasü.

U.S. State Department odongtar Matthew Miller-i Hombar nikongdang osangbener den jembidang, "Bendang lima nung America nung kumzuka ayutsü ya onok asoshi tongtipangtiba mapa lir," ta shia liasü.

Ajisüaka Dorsainvil aser lar jala chiyoktsü asoshi kechi mera sa agia lir, ta asüngdang dang pai kecha melangzü.

"Onok Haiti ketdangsur den

teti osang agiteper. Onoki maneni parnok aser asen US sorkar indang interagency partners den külemi inyaktsü, saka iba ken o tang tebushidak asünung ni kecha meshitettsü," ta Miller-i ashi.

Haiti Ato Kilonser Ariel Henry indang senior advisor Jean-Junior Joseph-i WhatsApp message ka nung ashiba agi, iba ken o ya Haitian National Police temi amshir.

Dorsainvil aser lar tanur samaba anogo nung US State Department ajanga 'non-emergency embassy personnel' aser parnok kinungertem dang tensa tamajungba akumba mechi Haiti nungi ainshitsü totuyuba agütsü, kechiaser Port-au-Prince tesem tuluka mapa tamajung inyakba telok temi agiogo.

Parnokisa Haiti nung aliba US senso ajunga dang akok tashi tekeraba nung iba linük yutsür ainshitsü ajungshi, kechiaser yangji nisung apuba, mapa tamajung inyakba, nüburttem anisüngzük makaba aser health care infrastructure kanga majung lir.

ANO GO ABEN TSÜNGREM DEN

SAKSALEMA LIANG

"Saksalema liang, tamang nung akanga noktakang. Teburchi ama liang, tashi itang.

~ I Kor. 16:13

Korint yimti aser arogo nung nüsüng nüburttem tesem balala nungi sentepa ali, mapa balala inyak. Yihuda aser bendangertem liasü, parnok rongnung telungjem maliasü, tiyazü tesayuba adok, kari tanela sempet nung ulua asüküm, kati ka anem, tamanger kari odia temenen benshi aser yamala tebilemtsü agi tonger aliba mapang ka nung Pauli tamangertem saksalema tamang nung akanga noktaka alitsü ajungshi, Sepai ka koda saksalema alir yamaji alitsüla ta Pauli sayur.

Tamangertem asoshi temalen-a telunglena tatidang aser sang agi sünga meketa lir. Anogoshi wadang nung item ya ajurur anungji shirnok saksalema lir parnokji kumzuka alitsü. Telunglen indangji tangari mangu pei-i dang metetba aser anguba shisatsü, teshisadangba, sentong, mapa, jakla, mulungsentsü ajungaji kanga dang meita alitsüla. Tsüngremibo ajak ateta angur asünung Pa tsüngdang shitak alitsüla.

Temalenji meteta ngua aliba anogoshia ajuruba temenen mapatem lir: tekülakoktsüba mapa ajak nungi merükteta alitsüla. Mopung balala agi oner aoba süngotu ama mesüi tamang nung marakzüi noktaketba tamanger kaka asenok südi.

SARASADEM:

Mapang ajak nung saksalema aliba taküm ni kümdakjang. Amen.

Manipur azüdokshi ya tamangba yimsü nungi masü: Khristan putir



Manipur tensa dak sendakba nung assembly session ka tangsa ayongzükang ta takhangba agüja Kwairamband Ima Keithel tsür temi Hokulbarnü Imphal West nung aliba Raj Bhavan kima longkak aitba noksa nung angur.

New Delhi, Luroi/August 01 (Agencies): Khristan putir Oswald Cardinal Gracias-i ashiba agi, Manipur nung tang azüdokshi adoka aliba ya tamangba yimsü masü saka kin tsüngta rara lir.

Hokulbarnü BJP IT Cell tekolakba Amit Malviya ajanga

Twitter nung video ka lemsatepba nung "His Eminence, Oswald Cardinal Gracias-i tang Manipur nung kin balala tsüngta rara adoka aliba indang ashir," ta zülua liasü.

Putiri iba video nung ashiba agi, "Ibai tribal tsüngta rara lir. Kin ana, akhi mapang nungi

tsükchitepa aru... aser legislation kar yangluba mechi pokma. Iba rara asoshi tamangba yimsü nung kongshi saka ibai tamangba yimsü ana tsüngta rara masü. Ibai kin ana tsüngta lir. Tensa tamajungba akumtsü asoshi tang asenoki kecha meinyaktsüla."

Putiri jembiba nung Malviya-i temelenshi tilaka aliba rajemja, ibai legislation masü 'judicial pronouncement' ajanga tensa mejungi akum, ta ashi.

Putiri jembiba ya kanga tongtipang lir, kechiaser social media balala nung rara ya Hindu Meiteis aser Khristan Kukis tsüngta lir ta jembir.

Anungji kin ana tsüngta raraba ya tamangba yimsü nung ajemdaker rarar ta olulu prokshiba remsepba nung yaritsü akok.

Kasa mapang Shiv Sena (UBT) Rajya Sabha MP Priyanka Chaturvedi-i Centre aser Women and Child Development Minister, Smriti Irani aija liasü, koba May 3 nü tenzü.

Tweet ishika nung lai ashiba agi, "Manipur nung tetsürttem mangsa anir yimtung nung senzua tashiyim amshia shi nung medemba ya May 4 nü atalok. FIR bo May 18 nü benok. Home

Minister-i Manipur ya anogo asem asoshi May 29 nü semdanga liasü. Iba tatalokba aser ano danga tatalokba indang pa dang mashi?"

"Home Minister dang item tatalokba indang osang agütsür alinungbo kechiba iba video tema adok tashinung aibelener nem temerenshi magütsü aser pai kechiba party ajak senden June 24 nü amendang melemsatep? Pa nem item osang magütsü asünungbo, CM, state aser central intelligence nungi telangzüba malitsü asü? Video tangoker dak alaka nisung shinga nema temerenshi magütsü!"

Manipur governor Anusuiya Uike ya tribal kin nungi tetsür ka lir. Tir Droupadi Murmu ya India nung tribal tsür mezüngbuba tir lir. Ajisüaka tang tashi Manipur tensa indang osang kecha meshia mali mesüra yimjak nung aitsüba mali, ta Chaturvedi-isa ashi.

**AO OSHI ANGAZÜKDAK:
TANÜ ANGAZÜKTSÜBA OJANG**



Rokzü

(v) ajemajema melitet arakzü (restless)

* Tenla kidang sentep alidang tanurtem kanga **rokzü**.

Rong

(n) tzüym aser ayong nung khu aser nisung bener senzüba (ship, boat)

* Tzüym nung khu tulu bener jajaba **rong** aika lir.

OLONG PAITEP # 6594

1				2				3		4
5		6								
							7			
8										
										9
		10					11			
				12				13		
14										
							15			
16										

TIPIEN

- 2. Auonungchiyongtsü asenba
- 5. Mangyimba mapang
- 7. O tamendakdak
- 8. Peidak malangba
- 10. Juli
- 12. Sen ayudak
- 14. Tenük agi ajitet
- 15. Tamajung aküm
- 16. Apuso

LANGTSÜNGLEN

- 1. Lenmang
- 2. Aor kidong ka tenüng
- 3. Tenarong maten
- 4. A _ _ _ g
- 6. Mopung apodoka
- 9. Tonglipang tagitsü
- 10. Menungra bilem
- 11. Aiür
- 13. S _ _ _ k
- 14. T _ _ _ r

OLONG PAITEP # 6593 TELANGZÜBA

TIPIEN :

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tassen, 13. Lemjem,
- 15. Tambu, 16. Khuret,
- 17. Sang.

LANGTSÜNGLEN :

- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar, 11. Tatok,
- 12. Amang, 14. Jala.



Yimdak alir-i Alokba dang asüngdang

Yimdak-lir : Temba...'Senior Citizen' ya shirnok dang ajar...???

Alokba : Temba...Item dang ya 'Senior Citizen' ta ajar...

- 1. Shirnoki apuani aser chirnur tenüng amaa-adoker.
- 3. Shirnoki chiyunger sernung mechiyunga ta ashir.
- 4. Shirnoki Anushi abener ta ser Torch light abener.
- 5. Shirnoki mangashir sernung angashir ama sayur.
- 6. Shirnoki manenteti talang-lang sarasademer.
- 7. Shirnoki memeteti natsü (Urine) naloker.
- 8. Shirnoki o küsa aiben lephsia jembir.
- 9. Shirnok melamela kümli adoka jashir.
- 10. Shirnoki chi-pasa mechiyungnur.

Tesayur : Oooh...!!! Alokba na tabensaba ajaa. ~ **Lilir- L.Kika Pongener.**

Tanur asoba anogo nung salem osang den noksa angati adokdaksünöra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.



Tuensang nung August 1, 2023 nü Langpangkong Senso Telongjemi Tsüngremmung benjong ayongzüka mungogo. Iba sentong nung DIET Tuensang nung Vice Principal, Wb.Limawapangi jembidang, " Tsüngremmung ya Tsüngrem nungi temoatsü jazükba benjongmung ka lir, anungji nisung ajaki Tsüngrem meteta alitsü aser sobaliba sapua bentshitsu ajungshia liasü. Iba benjongmung nung Tuensang nung alir Langpangkong nung gazetted officer-temi yimbok süja liasü. Iba sentong nung Langpangkongtsürtemi ken tena tsüngsangba noksa nung angur.

Lisopur tetsürtemi Moreh jila nungi state police agientsü akhanger

Imphal, August 1, 2023

(Agencies): Indigenous Tribal Leaders Forum (ITLF) indang tetsür kongsangi Moreh nungi State Police agientsü takhangba agüja lungkak aitogo.

Parnoki Manipur kübok Churachandpur nung mener lungkak aitba sentong ka ayongzüka agi.

Moreh jila nungi Manipur

state police magienra

Churachandpur district ajungalen lungkak aitba sentong tulu ayongzüka agitsü ta parnoki amokmerenogo.

Taoba mapang Manipur kübok Tengnoupal District nung aliba Kuki-Zo tetsürtemi aonung highway nung mener chiyungtepa lungkak ait.

July 28 nü Moreh jilai state

forces marudaktsütsü atema

parnoki lenmang noktanga liasü. Manipur sorkari Moreh jilai state forces yoktsü merangba anema nübertemi lungkak aiter.

Indian Reserve Battalion, Manipur Rifles aser Commando personnel adenba gari 10 convoy ka Moreh-i aodang tetsürtemi Tengnoupal nung noktanga liasü.

Imphal kitsükkirong lendong nung Rs 1 crore rongdok

Imphal, August 1, 2023

(Agencies): Imphal nungi kilometer tesadang ka shi pilar Zomi Village aser Kekru Pat Part II nung kitsükkirong lendong tulu ka atalokdang Rs 1 crore jungnüa akoksaogo.

Hombar aonung 9:00 ako meta iba lendong atalok aser lisopur ka kidang nungi mi adokba sülen temeket aliba kitem arong.

Iba mapang storerooms 3

mitsü küma rongdok aser Hombar aonung 12:00 meta nun gang mi ensepteta liasü. Milak jagi Kekru Pat Part II nunga kongshi aser idakjia takoksa jenti ajuruogo.

Iba lendong nung Naga nung Akam Kamei'er tera rongdok aser pai ashiba agi fire tenders, kiyongertem aser police aruba ajanga mi enseptet.

Iba kitsükkirong lendong

nung Naga, Manipuri Muslim aser Kuki nung kitem rongdok ta ketdangsürtemi ashi.

Iba lendong ya electronic short circuit ka ajanga adok asütsü akok ta Fire Service osang ajanga angazüker.

Mi ajanga Rs 1 crore shi rongsen akoksar alitsü ama asadangtetogo aser iba tatalokba atema maneni bushisingdang südar, ta Fire Service ajanga metetdaksü.

NH-37 nung excavators 14 aser trailer ka rongdoktsü



Imphal, August 1, 2023

(Agencies): Manipur nung Imphal nungi Jiribam tashi NH-37 mapa inyakba nung amshiba excavators 14 aser trailer truck ka rongdoktsüogo.

Keithelmanbi aser K Senam yimtsüngtem tsüngda tesem ka nung mejangjba nisung kari garitem rongdoktsü ta excavator kibur Nongmaithem Inao-i ashi.

Nisungtem jagi cranes amshia mi agi rongdoker aliba excavators raksatsü aser Silchar, Assam nung yinsang yokdoktsü merang ta pai ashi.

Gari kiburtemi police

parnoki bushisingdang südar, ta Inao-isa ashi.

National Highway-37 junga melapok tashi August 1 nungi Assam aser Dimapur tsüngda lisem abenba garitem mesenzütsü ta Manipur Sand Distributor Association-i osang sangoktsüba mapang ka nung iba lendong atalokogo.

Nija truck kiburtem aser company temi iba nung shilem agidaktsür ta MSDA general secretary Gurumayum Shitaljit-i ashi.

Manipur nung NH-37 nung ozüng alema inyakerem mapa balala inyaka arur aser Kuki o Meitei nung ita asem tashi

rarayonga arudang iba lenmang nung timtem kanga ajurur.

NH-37 nung ozüng alema inyaksangshirtemi truck gari shia nungi Rs 5,000 meshir.

NH-37 nung telungpurtemi prangpong bener tashiyim agi sen sarur, ta All Manipur Road Transport Drivers' and Motor Workers' Union (AMRTDMWU) Secretary General M Anil Meitei-ia shiogo.

Prangpong amertemi New Keiphundai nung truck garitem anendaktsür aser Jiribam-i aoba truck shia dang Rs 5,000 meshir, ta Meitei-isa ashi.

Aung San Suu Kyi nem ken o kar nung taitok agütsü



Myanmar nung 2021 kum mitkar temi tashiyim amshia sorkar atsungdoker kum ana ajungba temaitsü Bangkok, Thailand nung aliba Embassy of Myanmar kimalen nurburtemi Aung San Suu Kyi indang noksa amer temeyong asem sayua longkak aitba noksa nung angur.

Naypyidaw, Luroi/August 01 (Agencies): Myanmar nung military yimsüsürtemi parnoki atsungtoker aliba lenir Aung San Suu Kyi nem ken o 19 nungi pongu nung taitok agütsüogo.

Kum ana tejakdang military-i sorkar atsungba sülen military lenirtemi Suu Kyi ken o 19 nung aitsü aser tepuokdak kum 33 ayutsü atema obendang agüja liasü, ta media sangdong balala ajanga metetdaksü.

Taitok koba Mongolbarnü state media nung sangdonga liasü, iba ya Buddhist Lent tenung nung tepuoker 7,000 dak tema nung taitok agütsüba nung shilem ka lir.

Taoba lenir shiba osang ajanga ashiba agi taoba hopta tepuokdak nungi linük yimtiba Naypyidaw nung ki kati anir oa house arrest nung toktsüogo, la 2021 kum Februry ita military-i lai aniba sorkar atsungtokba sülen nungi sota yua liasü.

La aija aliba ken o 19

prongla atema lai tang okadak temepeshiba benoka lir. Suu Kyi ya ozüing alema inyaksangshitsü atema nurburtem rongmesoba, election nung ochi mashi inyakyim benoka inyakba aser tanga ken o balala nung ochi mashi inyakba amala ken o tem nung aitsür lir.

Lai item taitsubatem ajak magizüki arudar.

"La maneni ki toktsür aotsü asoshi memelatsü," ta source kati ashi.

Kasa mapang nung AFP news agency sangdong ka ajanga ashiba agi, arishi kum 78 tain yimden yimsüsür ya ken o 14 nungbo maneni aitsür lir.

"La nem bendanga tatok magütsütet, ajisüaka ken o kar nungbo tatok agütsüogo. La maneni ken o 14 nung aitsür lir. Ken o 19 nungi pongu atema dang taitok agütsü," ta legal source kati ashi.

Kasa mapang nung taoba tir Win Myint nema taitok

agütsüogo, ta Associated Press news agency-i metetdaksü.

Aung San Suu Kyi ya Myanmar nung lenir Aung San'er jala lir aser la military yimsüsüba anema nokdakba atema 1989 kum house arrest nung toktsü.

1991 kum lai Nobel Peace Prize agizük aser 2010 kum house arrest nungi chioka liasü.

Lai aniba National League for Democracy (NLD)-i 2015 kum election akok. Iba sülen parnoki maneni 2020 kum election akok, ajisüaka military-i election inyakyim nung ochimashi inyakyim sendaka lir ta shia sorkar atsünga liasü.

Military-i sorkar atsungba sülen Myanmar nung mepetmesü tulu adok aser security force temi tashiyim amshia nurburtem azüoka liasü. Coup sülen Myanmar nung tang tashi nung nisung 3,800 dak tema tepsetogo, ta local monitoring group kati ashi.



OFFICE OF THE
UNGER SENSO BENDANG ALI TELONGJEM
H.O. Dimapur, Nagaland
Sub Centre: **Kohima**

TENÜNGSANG AGÜTSÜR

Unger Senso Bendang Ali Telongjem ajanga neburtem shirnoki sa takok nguteta tenüngsang bener arutsüogo parnok nem tenüngsang agütsür aser teyanglur Tsüngrem tenüng asanger.

1. **Miss IMNAJUNGLA** D/o Mr N.Matong Jamir and Mrs Chubala Imsong i Nagaland University ajanga Under Graduate tatitang 2023 akiba mapang B.Sc Zoology department nungi Topper nguteta liasü.

2. **Miss LIMANARO IMSONG** D/o Late Mr Jongmalepzuk and Mrs S. Moala i Sikkim University nungi Political Science department nung, Topic- "**Identity Politics and Voting Behaviour: A Study of Ao and Angami Tribes of Nagaland**" nung ajemdaker, D e - gree of Doctor of Philosophy (Ph.D) nguteta liasü.

Tsüngremi nenok takum manini moajangma ta USBAT ajanga lemsateper.

Sd/-
N. Lima Imsong
President USBAT.

Sd/-
Walu Jamir
Secretary USBAT

OFFICE OF THE MOLUNGYIMSEN KAKETSHIR TELONGJEM, MOKOKCHUNG, NAGALAND KONANG TETUSHI AGÜTSÜR

Tatidang akiba balala nung jenjang tajung nung takok Tulu ngutetba asoshi item kaketshir nem konang tetushi agütsür-

1) **Kr. Mademshila Jamir**, daughter of Mrs. & Rev. S. Tajungsang Jamir, Doctorate nungja, Doctor of Philosophy in Geology (Ph.D), Dissertation title : "Landslide Susceptibility, Vulnerability and Risk Assessment of Noklak Town" Nagaland University, Meriema.

2) **Kr. Lenyangerla**, daughter of Mrs. & Mr. Watimeren, Academic Award nungja, The Rev. Henry Goldsmith Memorial General Proficiency Award (M.Th), Eastern Theological College, Jorhat.

Maneni lokti nem narokum renloktsüba shisashir ka süang ma. Teyanglur Tsüngrem-i nena takum aser wadang moajangma ta Kaketshir sarasadem.

Sd/-
Tiakumzuk.
President, MSU

Sd/-
TIAENLA
GEN/SECY., MSU

France-i Niger nungi lisopurtem anien tenzüksü

Paris, Luroi/August 01 (Agencies): France foreign ministry-i ashiba agi, Tir Mohamed Bazoum atsungtokba sülen Niger nungi lisopurtem anientsü atema sentong yanglur inyaksangshi tenzüikogo.

"Niamey nung tensa aser yakünü onok indang embassy amakba dak apir aser tayimtsü senzusenpong shibangtsür asünung lisopurtem parnok sasa yimti toktsür moteter, anungji lisopurtem aser Europe nung shirnoksa linük toktsür oner parnok asoshi sentong yangludar," ta foreign ministry-i ashi.

"Lisopur anienba sentong tanü nungi tenzüksü," ta ministry-isa metetdaksü.

Ministry website ajanga ashiba agi, 2022 kum Niger nung France nung 1,200 dak tajemba liasü.

Kasa mapang nung Italy indang foreign minister-i Mongolbarnü ashiba agi, lisopurtem Niger nungi anientsü atema sorkari tayimtsü ka anepalutsüsü.

"Italy sorkari tayimtsü ka anepaluja Niamey toktsür aotsü atema lisopurtem tem nem maongka agütsüsü," ta Foreign Minister Antonio Tajani-i ashi.

July 26 nü Bazoum atsungtokba ya kum asem majung tsungda West aser Central Africa nung military-i sorkar atsungtokba tenetbuba liasü.

Economic Community of West African States



Emmanuel Macron

(ECOWAS)-i Niger nem tenokdangba balala agütsüogo aser tashiyim amshitsü amokmerenogo. Iba dak sendakba nung Burkina Faso aser Mali indang military sorkari linük tema nungi Niger amakba ya parnok anema rara jazükba ka ama züngshitsü ta ashi.

Deobarnü coup pusemertemi France indang wako rongtoktsü aser Niger yimtiba Niamey nung France indang embassy maka liasü. Iba tatalokba sülen Niger nung France nung makra telangzüba tesashi agütsüsü ta France tir Emmanuel Macron-i shia liasü.

Niger nung telungpurtem den raratsü atema France nung sepaitem aika lir, saka local temi ashiba agi, parnoki parnok telung ken o nung France nem ojang dang jushidaksüner.

GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA

NO. DTE/ESTT-2/02/2023-24/

Dt. Kohima, the 1st Aug. 2023

NOTIFICATION

In continuation to this office order even NO. DTE/ESTT-2/02/2023-24/ , it is to notify all the NSEE-2023 appeared®istered candidates who wish to apply for the seats received under the North Eastern Council (NEC) State Reserved Quota during the session 2023-24 (as shown in the table given below) are to submit an application in plain paper(A4 size) to the undersigned on or before 10thAugust 2023 along with the NSEE Serial No and Marks secured in class XII (PCB), Contact no.(at least two.)

Sl. No	Course name	No. of seats	Remarks
1.	B.Sc(HONS) AGRI	01	Self -finance
2.	B.V.S.C & AH	02	
3.	B.Sc. (HONS) Community Science	01	
4.	B.Sc(HONS) Sericulture	01	
Total		05	

Candidates who were already selected and nominated to various Para-medical, Agri& allied Courses during the first and second counselling held on 13th July & 20th July 2023 are not eligible to apply.

The selection & nomination shall be purely based on NSEE-2023 merit depending on the complete documents being submitted to this office.

No requests whatsoever shall be entertained/ considered after the last date i.e., 10th August 2023, 5:00 PM.

(Er. VIPULHOU LHOUGU)
Director.

GOVERNMENT OF NAGALAND DIRECTORATE OF HIGHER EDUCATION NAGALAND: KOHIMA

NO. HED/GRANT-IN-AID/4/2012-13

DATED KOHIMA, THE 1ST AUG. 2023

NOTIFICATION

EligibleNAAC Accredited & AAA Inspected Private Secular Colleges and Government Affiliated/Accreditedof category A&Bfor Theological Collegesare hereby informed to download the Grant-in-Aid form for the year 2023-2024through the Department's website www.highereducation.nagaland.gov.in and submit the filled up form to the undersigned from 7th August to 31st August 2023. Forms will not be accepted after the stipulated date.

Sd/-
DIRECTOR
HIGHER EDUCATION.

World Cup: Netherlands aser United States na last 16-i iogo



Vietnam goal 7-0 agi akokba asaya nung Netherlands tsür Danielle Van de Donk-i (teyong) lar team atema goal pongububa idaktsüba sülen Sherida Spitse (tachichi) aser Jill Roord (tabelen) na den pelatepba noksa nung angur.

Luroi/August 1, 2023

(Agencies): Mongolbarnü tetsür World Cup nung Netherlands-i goal 7-0 agi Vietnam madak takok ngua parnok United States jakdang group E nung temaba jenjang nung tembanga last 16-i iogo.

Iba asaya nung Esmee Brugts aser Jill Roord nati goal anana idaktsü aser taküm World Cup nung goal timtiba agi asaya ka kokogo. Iba asaya masü tsüingda Germany-i goal 6-0 agi Morocco koker liasü.

Asaya masaya tsüingda Dutch coach Andries Jonker-i ashiba agi, pai par team ya par telok nung temaba jenjang nung tembangdaksüner, ajita asünung dang parnok last 16 nung Group G nung temaba jenjang nung tembangba Sweden team den masayatsü, shirnoki Italy goal 5-0 agi koka liasü.

Jonker-i jangraba ama par team-i kanga junga asaya Vietnam madak takok

ngutetogo, shirnok taküm mezüingbuba Women's World Cup nung asayaba mapang asaya ka nung danga takok monguteti tembangogo.

Asaya nung Netherlands puri mezüingbuba goal pezü ya minute 23 tsüingda idakja liasü.

Asaya tenzükli nungi parnoki Vietnam team kanga nongshia asaya aser Netherlands team-i minute 90 nung goal nung 42 ben metsüa liasü.

Asaya nung mezüingbuba goal ya Lieke Martens-i minute tibuba nung idakja liasü. Iba sülen minute asem dang lir Forward Katja Snoeijis-i tanabuba goal idaktsü.

Brugts-i goal tasembuba idaktsüba sülen Roord-i minute 23buba nung goal pezübuba idaktsü koba la asoshi mezüingbuba goal liasü.

Asaya mezüingbuba shilem tembangtsü lia Roord-i metsüba ball ka Tran-i kanga junga nokdang ajisüaka ball nokdang adokba ya midfielder

Danielle van de Donk-i idakja goal 5-0 nung asaya mezüingbuba shilem tembang.

Asaya tanabuba shilem nung Vietnam goal keeper Tran melena Thi Hang Khong ait aser Netherlands tsür arishi küm 17 tain Wieke Kaptein-a asaya tanabuba shilem nung aita liasü.

Maneni asaya nung Brugts-i lar team asoshi goal trokbuba idaktsü aser asaya atemtsü minute tenet anunga lia Roord-i goal tenetbuba idakja liasü.

Kasa asayamung nung taoba World Cup koker aliba team United States aser Portugal na asaya goal kaka danga magütsüti tembangba sülen US team last 16-i iogo.

Iba asaya draw nung tembangba sülen Vlatko Andonovski-i aniba team ya Group E nung tanabuba jenjang nung tembangogo aser parnok last 16 nung Group G nung temaba jenjang nung tembangba Sweden team den asayatsü.

Pakistan hockey team Attari-Wagah arrtsü adena India-i aruogo

Luchii/August 1, 2023

(Agencies): Asian Champions Trophy nung shilem agitsü atema Pakistan hockey team Mongolbarnü Attari-Wagah arrtsü adena India-i aruogo. Iba asayamung ya Brehostibarnü nungi tenzüka Chennai nung asayatsü.

Ajaki kanga danga yonga aliba India aser Pakistan na asaya ya August 9 nü asayatsü.

Pakistan team Amritsar-i aruba sülen Mongolbar aonung Chennai-i aotsü.

Kasa mapang nung Harmanpreet Singh-i aniba India team-i Mongolbar anepdang Chennai tongaogo.

India team Brehostibarnü China den mezüingbuba asaya masaya tsüingda Egmore nung asayamung asayatsü aliba Mayor Radhakrishnan Hockey Stadium nung training agitsü.

Pakistan team-a kasa anogo training agitsü.

Asian Hockey Champions Trophy ya 2010 küm mezüingbuba tetsür team tem atema tenzüka liasü.

Women's Asian Champions Trophy kanga takok ngua asayaba sülen teburtem tetoktepba 2011 küm tenzük, kong continent nung temaba jenang nung aliba team trok asayar.

2013 küm tashi ACT ya kümshia asaya liasü, ajisüaka 2016 küm nungi iba asayamung ya küm ana nung khen asayar.

2020 küm iba asayamung asayatsü aliba ya COVID-19 wara poktetba ajanga 2021 kümi belener ao.

India aser Pakistan nati iba asayamung asembenben koka lir aser 2018 küm takok marok lemsatepa liasü.

2021 küm final asaya nung Japan akokba sülen South Korea-i iba asayamung tesüsabuba koker lir.

Pakistan hockey squad: Muhammad Umar Bhatta (capt), Akmal Hussain, Abdullah Ishtiaq Khan, Muhammad Abdullah, Muhammad Sufyan Khan, Ehtsham Aslam, Osama Bashir, Aqeel Ahmed, Arshad Liaquat, Muhammad Imad, Abdul Hanan Shahid, Zakaria Hayat, Rana Abdul Waheed Ashraf (vc), Roman, Muhammad Murtaza Yaqoob, Muhammad Shahzaib Khan, Afraz, Abdul Rahman, while the standby includes Ali Raza, Muhammad Baqir, Muhammad Nadeem Khan, Abdul Wahab, Waqar Ali, Muhammad Arsalan and Abdul Qayyum.

WFI tir mapa atema nisung 4-i Nominations file süogo

Luroi/August 1, 2023

(Agencies): Delhi state body tekolakba Jai Prakash-i, tir mapa densema August 12 nü Wrestling Federation of India (WFI) elections atema mapa asem asoshi nomination file süogo, ta returning officer-i Mongolbarnü metetdaksü.

Prakash dak alia iba mapa asoshi UP wrestling body vice-president Sanjay Singh, Jammu and Kashmir senior Senior Superintendent of Police Dushyant Sharma aser 2010 Commonwealth Games gold medallist Anita Sheoran nungeria tir mapa asoshi nomination file süogo.

Par pezü rognung Prakash aser Singh na ya Brij Bhushan'er telok nungi lir.

Sheoran, shiba Brij Bhushan anema benokba sexual harassment ken o nung tenük kuli agütsür ka liasü, pa Haryana nungi aser state police nung züingoksema lir, ajisüaka Odisha tenüing nung nokdaksü.

Returning officer aser taoba J&K High Court Judge Mahesh Mittal Kumar-i Mongolbarnü mapa 15 atema candidate tem official list sangdonga liasü.

Kasa mapang nung Prakash-i, vice-president aser secretary-general mapa atema-a nomination file süogo.

Maneni secretary-general mapang atema nomination file asür par asem rongnung Chandigarh association general secretary aser WFI vice-president Darshan Lal aser Prakash na Brij Bhushan'er telok nungi lir aser Railway Sports Control Board (RSPB) secretary Prem Chand Lochab opposition telok nungi lir.

Nomination file asüba candidate tem yamai alitsü:

President: Sanjay Kumar Singh, Jai Prakash, Dushyant Sharma, Anita Sheoran.

Senior vice-president: Asit Kumar Saha, ID Nanavati, Devender.

Vice-President: Hamza-Bin-Omer, Kartar Singh, N Phoni, Asit Kumar Saha, Jai Prakash, Mohan Yadav.

Secretary-general: Darshan Lal, Jai Prakash, Prem Chand Lochab.

Treasurer: Satya Pal Singh Deshwal, Dushyant Sharma.

Joint secretary: RK Purushotham, Rohtash Singh, Bellippady Gunaranjan Shetty, Kuldip Singh.

Executive members: M Loganathan, Neivikuolie Khatsii, Rakesh Singh, Ummed Singh, Prashant Rai, Rajnish Kumar, J Srinivasa, Ratul Sarma, Ajay Vaid, Kuldip Singh.

Australia Open: Treesa aser Gayatri na tanabubaround-i iogo



Treesa Jolly aser Gayatri Gopichand

Luroi/August 1, 2023

(Agencies): Commonwealth Games bronze medallists Treesa Jolly aser Gayatri Gopichand nati Mongolbarnü Canada tsür Catherine Choi aser Josephine Wu na straight game nung koka Australia Open Super 500 badminton tournament tanabubaround-i iogo.

Treesa aser Gayatri na Mongolbarnü sayaba BWF ranking nung jenjang ana tejakdangi tua 17buba tongtetogo aser tenati iba asaya 21-16 21-17 agi Catherine Choi aser Josephine Wu na koka liasü.

India tsür la ana yagi All England Championships nung semifinal tonga asayaba dak alia taküm asayamung ka nunga danga tanabubaround adena asayadanga mali aser iba asayamung nunga tanabubaround adentsü tasak asütsü,

kechiyong tena world number 4 Japan tsür tarep Mayu Matsumoto aser Wakana Nagahara na den asayatsü lir.

Ashwini Ponnappa, küm pezü sülen tang mezüingbuba iba asayamung nung shilem agia liasü ajisüaka takok mongutet. La aser partner Tanisha Crasto na 11-21 21-14 17-21 agi Indonesia tsür Febriana Dwipuji Kusuma aser Amallia Cahaya Pratiwi nati mezüingbubaround nung tsükdaktsüogo.

Maneni tetsür tarep asayarsa N Sikki Reddy aser Arathi Sara Sunil nata Taiwan tsür Hsu Yin-Hui aser Lee Chih Chen nati 14-21 17-21 agi mezüingbubaround nung tsükdaktsüogo.

Iba asayamung nung PV Sindhu, Lakshya Sen aser HS Prannoy nungeria shilem agidar. Copenhagen, Denmark nung World Championships masaya tsüingda iba asayamung ya tatembangbuba asütsü.

BILEMDANGANG

"Takokba tashi memerangdangi tetoktsü."